

禮儀典第二百二十九卷

宗廟祀典部藝文二

議大禮疏

明應良

臣觀往者廷臣議定追尊興獻帝典禮詔行天下情文備至近以南京刑部主事桂萼等復倡異論致聖心疑二莫之適從下禮部再議蒙洞察惻誠不爲邪議所惑批荅有云奉承宗廟正統大議不敢有違斯言一出中外歡呼以爲聖人以義制情可以爲萬世法近聞衆議未安行取桂萼等來京大小臣工惶惑莫措竊恐主德未和百事罔度宮闈由是間隙上下由是猜疑有傷治化爲禍不小臣等備員大臣義均體國迺敢不識忌諱冒死上陳仰干天聽今之爲議者有二禮官之議欲考孝宗爲隆正統存所後者父子之名但重所後有拂皇上未安之心重本生者適中皇上未從之意此國論所以難斷而大體所以未定也臣等每爲皇上深思極慮而不得其說蓋聞諸所議皆據禮爲人後之禮與宣帝光武濮王之議皇上必以爲今日之事有不相類故尙欲博求典故以爲定論臣等竊謂禮文有未備者不必強以爲因人情有未安者不敢據以爲是程子曰長子不得爲人後若

無兄弟又繼祖之宗絕亦當繼祖禮雖不言可以義起此正皇上入繼之明徵也所謂繼祖之說豈必卽是以孫爲子中間亦須有父而後祖不爲絕憲宗祖也武宗絕祖之宗絕於皇上爲兄不可以爲父興獻帝終身臣服萬無越孝宗而直繼憲宗之禮皇上不得而父古今未有無父之廟不考孝宗而誰考哉是皇上以長子入繼武宗之統必以孝宗爲考而後憲宗之大宗不絕此則所謂以義起禮者也臣愚以爲今日議禮者當日旣以義起爲禮始卽當以義起爲禮終臣請極言所以不得爲禮之常者惟皇上俯垂審度焉卽知皇上盡從禮官初請斷以大義不顧私親於大宗正統斯爲得宜臣等亦知皇上父子至情誠有不能自安者今若力主二三小臣之說以興獻帝爲考追改孝宗爲別稱臣等又熟思之當武宗上賓之時太位猶虛上有昭聖皇太后爲天下母逾十六年遵祖訓與遺詔二三大臣贊謀迎皇上爲後又三年矣孝養恩慈中外頌美一旦別有所稱雖桂萼等之疏不敢言也皇上有難言也昭聖皇太后之心未得自安孝宗武宗之靈其何以慰也聖明淵默之下必自得之臣等不敢盡爲之說然則將如之何臣等以爲義起之禮惟合乎天理之正人心之安而已今之爭論不決所重者只爲父子之名考孝宗則興獻帝無他子考興獻帝則武宗奄棄孝宗

絕矣非皇上爲之子更無可繼之望興獻帝有皇上在後宮儲祥子孫千億他日以支子襲封主祀
適合古者孫從祖之說故曰抱孫不抱子孫可以爲王父尸不可以爲父尸也興獻帝固始封之祖
與九廟同其世享矣獨於名稱之間欲求兩全而無害臣等復有一說庶幾可通傳曰衆言淆亂折
諸聖太祖高皇帝聖人也兄終弟及儀禮未聞祖訓所載萬世不易今之大明律亦聖祖所定者五
服圖下有曰凡男爲人後者爲本生屬親孝服皆降一等爲本生父母降服不杖期所後者固名父
母本生者亦名父母蓋有本生二字以冠之則爲所後父母有別而無妨猶存一本之義也至於妻
爲夫族服圖下曰夫爲人後其妻爲本生父母舅姑服大功服舅姑之名猶不可變父母之名可以
例推尙懼或者疑於二父之名禮文律文有同居繼父不同居繼父若未妨於一本之義二統二父
之疑庶幾可釋仰維皇上既遵聖祖兄終弟及之訓而入繼大統似可以聖祖律文爲法而定禮擬
名稱於孝宗稱皇考於興獻帝稱本生考或美諡如孔子之父曰啟聖所後本生降殺輕重釐然自
別別廟之說實踵哀帝之失他日立後將毀之乎將存之乎萬世永祀將從太祖爲繼統乎從別廟
爲繼嗣乎伏望皇上必審於詢謀毋惑於邪說不爲目前之快意以犯後世之公議庶幾正統之傳

一本之意天理之正人心之安天下非重天倫非輕君臣之分父子之名可以兼全而無失矣臣等叨陪廷議各思其憂反覆思維僉同衆志不得已而爲此委曲折衷之論庶幾少達二君二親之嫌亦亡於禮者之禮也

不宜別立廟祀疏

沈引培

竊惟禮以祖宗所定者爲尊議以經傳所依者爲正伏臣莊誦諭札以祧廟贈后三位終歲無一祭見廟繼后聖母七位忌辰不得設祭服青孝念難已將本恩殿建殿宇二層供安已祧九廟帝后而祔三贈后於其中及見廟繼后聖母逢忌辰之日宜否設祭玉音煌煌天語昭示以太廟大禮不敢輕議而又通著部科同太常寺折衷情制詳酌典儀微臣拜揚明命敢不畢竭愚誠用光聖孝夫禮有萬世之經有一時之權經者推之祖宗而準比之經傳而符如太廟一帝一后奉先殿亦一帝一后是也權者祖宗所已行而禮緣義起經傳所不載而儀以情隆如別殿之專享奉先之祔安是也今日舍祖宗所定之禮而別求所爲禮舍經傳所依之議而別求所爲議有萬萬不敢出者臣請盡言無諱可乎考古無奉先殿之制太祖以時享未足展孝思特仿前代原廟神御殿之意而建奉先

殿於乾清宮之左成祖率循無改雖曰用常饌行人禮而太廟以象外朝奉先殿以象內朝而節
忌祭告太常題知光祿供獻禮未嘗不嚴且重也每室一帝一后如太廟寢殿其祔祧迭遷之禮亦
如之禮又未嘗不明且備也孝宗以孝穆紀太后不得祔太廟奉先殿別建奉慈殿薦享旣以避尊
復以專敬仁至義盡千古爲昭嗣孝肅周太皇太后崩孝宗召內閣劉健李東陽謝遷等議祔廟禮
一則曰事須師古末世鄙褻之事不足學再則曰宗廟事關係綱常極重豈可有毫髮僭差卒祔孝
莊錢皇后於太廟奉先殿孝肅則祀奉慈殿中室移孝穆居左世宗追上孝惠邵太后尊號亦祀奉
慈殿居右嘉靖十五年諭禮官以三后主旣不祔太廟又不祔陵殿似黜之非親之命會議以行禮
官言自古惟一帝一后配享於廟所生之母則祭於寢斯禮之正孝宗奉慈殿之建止祀生母以盡
孝耳禮於妾母不世祭謂子祭之於孫則止蓋繼祖重故不復顧其私祖母也今於孝肅曾孫也孝
穆孫屬也孝惠孫也禮不世祭義當擬祧但祧義惟遷主爲是而遷祔陵殿歲時祔享尤爲曲盡非
前代所及世宗從之罷奉慈殿祭二十九年祔孝烈方皇后於太廟時以孝潔係元配持議久而始
定穆宗卽位仍祔孝潔於太廟而祀孝烈於弘孝殿又別祀孝恪杜太后於神霄殿萬曆三年諭禮

官以孝肅孝烈孝恪宜奉於奉先殿祔享部察嘉靖十五年議祔陵殿不議祔奉先殿神宗曰奉先殿見有孝肅孝穆孝惠三后神位係我皇祖定宜遵照祔安不必另議而并罷弘孝神霄之祭自是繼后皆以祔享奉先殿爲成例矣當孝宗始建祧廟暨世宗再正太祖南向之位爾時明明穆穆酌古準今豈不念太廟既有祧廟奉先殿何無祔廟良以遠廟爲祧去祧爲壇去壇爲墀禮有不得不降情有不得不殺先儒嚴陵方氏曰王者之於祖禰以人道事之則有寢以神道事之則有廟天子七廟而周官隸僕止掌五寢者以二祧將毀先除其寢事有漸故也祭神道也薦人道也致堂胡氏曰天子七廟有祧焉不患其數益也有禘焉不患其乏饗也故宗廟之禮繇子孫不忘而建不忘者仁也斷以先王之義無敢損益於其間是則禮之盡也今欲建祧殿二層而又不在于奉先殿之後將以奉先祧殿名乎抑以何名乎無論宮廟卽遠有毀而無立且前此祧遷之神位俱安何所如送陵殿無迎回大內之禮若更製焉卽神位與神主不同十數世之後重取久祧之神位而題之不可可也周家卜世三千年八百止曰先公之遷主藏於后稷之廟先王之遷主藏於文武之廟耳未聞祧以九爲數而預計增加也昔殷高宗爲中興盛主彤日有雉雉之異祖己戒其典祀無豐於昵而

傳說亦云黷於祭祀時謂弗欽禮煩則亂事神則難子思子曰先王之制禮也過之者俯而就之不至焉者跂而及之禮稱王母不配言有事於尊可及卑有事於卑不敢援尊也皇上孺慕徹於重元孝思通於錫類然帝后之尊卑罔斂卽典祀之疏數無違在聖母可極尊崇而不必同於列后則列后宜俾孝享而未免抑於祖宗如魯立武宮煬宮春秋皆大書特書見其毀已久不宜立而輒立焉非卽違有終之義而哀公三年書桓宮僖宮災桓僖親盡矣宮何以存志其災以咎其復也皇上試以祖宗所定合之經傳所依今日既詔之國人他年將垂之青史可曰內殿之禮非外廷之禮比哉況祧廟三后但不得祭於太廟奉先殿而陵祭遣官焄蒿之感原未嘗不申必追罔極而事如存則立別殿以專祀聖母揆之闕宮奉慈之建猶爲合禮并忌日設祭服青似宜分別久近稍避祖宗統候聖明詳察

宗廟祀典部藝文三

詩

大雅鳧鷖五章

此祭之明日繹而賓尸之樂

鳧鷖在涇公尸來燕來寧爾酒既清爾殽既馨公尸燕飲福祿來成
鳧鷖在沙公尸來燕來宜爾酒既多爾殽既嘉公尸燕飲福祿來爲
鳧鷖在渚公尸來燕來處爾酒既湑爾殽伊脯公尸燕飲福祿來下
鳧鷖在潒公尸來燕來宗既燕于宗福祿攸降公尸燕飲福祿來崇
鳧鷖在疊公尸來止熏熏旨酒欣欣燔炙芬芬公尸燕飲無有後艱

假樂四章

疑此卽公尸之所以答鳧鷖也

假樂君子顯顯令德宜民宜人受祿于天保右命之自天申之
千祿百福子孫千億穆穆皇皇宜君宜王不愆不忘率由舊章
威儀抑抑德音秩秩無怨無惡率由羣匹受福無疆四方之綱
之綱之紀燕及朋友百辟卿士媚于天子不解于位民之攸暨

周頌清廟一章

此周公既成洛邑而朝諸侯因率之以祀文王之樂歌

於穆清廟肅雝顯相濟濟多士秉文之德對越在天駿奔走在廟不顯不承無射於人斯

維天之命一章

此亦祭文王之詩

維天之命於穆不已於乎不顯文王之德之純
假以溢我我其收之駿惠我文王曾孫篤之

維清一章

此亦祭文王之詩

維清緝熙文王之典肇禋迄用有成維周之禎

烈文一章

此祭於宗廟而獻助祭諸侯之樂歌

烈文辟公錫茲祉福惠我無疆子孫保之
無封靡于爾邦維王其崇之念茲戎功繼序其皇之
無競維人四方其訓之不顯維德百辟其刑之於乎前王不忘

天作一章

此祭太王之詩

天作高山太王荒之彼作矣文王康之彼咀矣岐有夷之行子孫保之

昊天有成命一章

此詩多道成王之德疑祀成王之詩也

昊天有成命二后受之成王不敢康夙夜基命宥密於緝熙單厥心肆其靖之

執競一章

此祭武王成王康王之詩

執競武王無競維烈不顯成康上帝是臯 自彼成康奄有四方斤斤其明 鐘鼓喤喤磬筦將將

降福穰穰 降福簡簡威儀反反既醉既飽福祿來反

離一章

此武王祭文王之詩

有來離離至止肅肅相維辟公天子穆穆 於薦廣牡相予肆祀假哉臯考綏予孝子 宣哲維人

文武維后燕及皇天克昌厥後 綏我肩壽介以繁祉既右烈考亦右文母

載見一章

此諸侯助祭於武王廟之詩

載見辟王曰求厥章龍旂陽陽和鈴央央絛革有鷩休有烈光 率見昭考以孝以享 以介眉壽
永言保之思皇多祐烈文辟公綏以多福俾緝熙于純嘏

閔予小子一章

成王免喪始朝於先王之廟而作此詩也

閔予小子遭家不造嬛嬛在疚於乎皇考永世克孝 念茲皇祖陟降庭止維予小子夙夜敬止
於乎皇王繼序思不忘

絲衣一章

此亦祭而飲酒之詩

絲衣其紕載弁俅俅自堂徂基自羊徂牛鼐鼎及鼐兕觥其觶旨酒思柔不吳不敖胡考之休

商頌那一章

舊說以此爲祀成湯之樂也

猗與那與置我鞀鼓奏鼓簡簡衍我烈祖
湯孫奏假綏我思成鞀鼓淵淵嘒嘒管聲既和且平依
我磬聲於赫湯孫穆穆厥聲
庸鼓有數萬舞有奕我有嘉客亦不夷懌
自古在昔先民有作溫
恭朝夕執事有恪
顧予烝嘗湯孫之將

烈祖一章

此亦祀成湯之樂

嗟嗟烈祖有秩斯祐申錫無疆及爾斯所
旣載清酤賚我思成亦有和羹旣戒旣平饌假無言時
靡有爭綏我肩壽黃耆無疆
約軾錯衡八鸞鸛鸛以假以享我受命溥將自天降康豐年纓纓來
假來饗降福無疆
顧予烝嘗湯孫之將

元鳥一章

此亦祭祀宗廟之樂追敘商人之所由生以及其有天下之初也

天命元鳥降而生商宅殷土芒芒古帝命武湯正域彼四方
方命厥后奄有九有商之先后受命

不殆在武丁孫子 武丁孫子武王靡不勝龍旂十乘大糒是承 邦畿千里維民所止肇域彼四海 四海來假來假祁祁景員維河殷受命咸宜百祿是何

長發七章

序以此爲大禘之詩蓋祭其祖之所出而以其祖配也蘇氏曰大禘之祭所及者遠故其詩歷言商之先后又及其卿士伊尹蓋與祭於禘者也商書曰茲予大享於先王爾祖其從與享之是禮也豈其起於商之世歟今按大禘不及羣廟之主此宜爲禘祭之詩然經無明文不可考也

濬哲維商長發其祥洪水芒芒禹敷下土方外大國是疆幅員既長有城方將帝立子生商 元王桓撥受小國是達受大國是達率履不越遂視既發相土烈烈海外有截 帝命不違至于湯齊湯降不遲聖敬日躋昭假遲遲上帝是祇帝命式于九圍 受小球大球爲下國綴旒何天之休不競不綏不剛不柔敷政優優百祿是遒 受小共大共爲下國駿龐何天之龍敷奏其勇不震不動不難不竦百祿是總 武王載旆有虔秉越如火烈烈則莫我敢曷苞有三蘖莫遂莫達九有有截韋顧既伐昆吾夏桀 昔在中葉有震且業允也天子降于卿士實維阿衡實左右商王

殷武六章

舊說以此爲祀高宗之樂

撻彼殷武奮伐荆楚采入其阻哀荆之旅有截其所湯孫之緒
維女荆楚居國南鄉昔有成湯自彼氏羌莫敢不來享莫敢不來王曰商是常
天命多辟設都于禹之績歲事來辟勿予禍適稼穡匪解
天命降監下民有嚴不僭不濫不敢怠遑命于下國封建厥福
商邑翼翼四方之極赫赫厥聲濯濯厥靈壽考且寧以保我後生
陟彼景山松柏丸丸是斷是遷方斲是虔松栢有槩旅楹有閑寢成孔安

太廟頌

魏王粲

建安十八年曹操爲魏公加九錫始立宗廟令粲作此頌以享其先始名曰顯廟頌後人更今名思皇烈祖時邁其德肇啟洪源詒燕我則我休厥成聿先厥道丕顯丕欽允時祖考
綏庶邦和四宇九功備彝樂序建崇牙設璧羽六佾奏八音舉昭大孝衍妣祖念武功收純祐
於穆清廟翼翼休徵祁祁髦士厥德允升懷想成位咸奔在宮無思不若允觀厥崇

宗廟頌

王肅

明德惟馨昊天子之眷祐我魏薄言起之起之伊何黎元時雍子之伊何曆數在躬於乎盛哉神明是通湛湛甘露濟濟醴泉或涌于地或降于天天地交泰品類蕃蕪祥瑞嘉應其集如雨屢獲豐年穀我士女祖考既饗於懽樂胥

宗廟歌十一首

晉傅元

夕牲歌

我夕我牲猗歌敬止嘉猷孔時供茲享祀神鑒厥誠博碩斯歆祖考降饗以虞孝孫之心

迎送神歌

嗚呼悠哉日鑒在茲以時享祀神明降之神明斯降既祐饗之祚我無疆受天之祐赫赫太上巍巍聖祖明明烈考丕承繼序

征西將軍登歌

經始宗廟神明戾止申錫無疆祇承享祀假哉皇祖綏予孫子燕及後昆錫茲繁祉

豫章府君登歌

嘉樂肆庭薦祀在堂皇皇宗廟乃祖先皇濟濟辟公相予蒸嘗享祀不忒降福穰穰

潁川府君登歌

於邈先后實司于天顯矣皇祖帝祉肇臻本支克昌資始開元惠我無疆享祀永年

京兆府君登歌

於惟曾皇顯顯令德高明清亮匪競柔克保乂命祐基命惟則篤生聖祖光濟四國

宣皇帝登歌

於鑠皇祖聖德欽明勤施四方夙夜敬止載敷文教載揚武烈匡定社稷恭行天罰經始大業造創
帝基畏天之命于時保之

景皇帝登歌

執競景皇克明克哲旁作穆穆惟祇惟畏纂宣之緒耆定厥功登此俊乂糾彼羣凶業業在位帝既
勤止維天之命於穆不已